



6. december 2018

Inatsisartut Suleriaasianni § 37 imm. 1 naapertorlugu Naalackersuisunut apeqquutit imaattut matumuuna saqqummiuppakka:

Naalackersuisunut apeqquutit:

- 1. Kalaallit Nunaata ukiorpassuarni sikumik/nilammik imermillu tunisassiulernissaq aallartinniartarnikuugaluarpa aannerusumilli kinguneqanngitsumik. Tassunga atatillugu paaserusuppara nunat allamiut nilammik imermillu tunisassiortut nunatsinni imermik tunisassiulernissamut aningaasaleerusunnginnertik pillugu qanoq oqarsimanersut?**
- 2. Naluneqanngilaq nioqqutissanik avammut tunisassianik assartuineq akisoorujussuusoq tassunga ilanngullugu minnerunngitsumik imermik nilammillu assartuineq. Taava sunaana pissutaasoq, Naalackersuisut sikumik/nilammik imermillu tunisassiulernissamut pilerisaariuarnerannut (takuuk konto 64.10.27 Inuutissarsiornermut siursaaneq aamma suliniutinik pilerisaarineq) uffu takusinnaallugu nunatsinni sikumik/nilammik imermillu nioqqutissiorluni aallartitsinissamut aporfiit annersaat tassaasoq aningaasartuutit qaffasinerujussuat?**
- 3. Maannakku siunissami sikumik/nilammik imermillu tunisassiulernissaminnut eqqarsartut aningaasartuutaat ikilisarumallugit Naalackersuisut suliniutinik sunik aallartitsilersaarpata taamaasilluta tunisassiamik iluanaarutigisinnaasatsinnik pilersitsisinnaaqulluta?**
- 4. Suliamut tunngatillugu Naalackersuisut allanik soqutiginarpoq paasissutissaateqarpat?**
(Inatsisartunut ilaasortaq Randi Vestergaard Evaldsen, Demokraatit)

Tunngavilersuut

Kalaallit Nunaanni ukiuni kingullerni 15-nngulersuni sikumik/nilammik imermillu tunisassiulernissaq aallararteriarneqartarnikuuvoq. Periarfissaq pioreerpoq - tamanna qularutissaanngilaq, kisianni nassuerutigisariaqarparput taamatut tunisassiulernissamut ulloq manna tikillugu sulii iluatsitsivissimanginnatta.

Tunisassiulernissaq pillugu pilerisaarinerit ikinngitsut ingerlanneqartarnikuupput - iluatsitsiviunngitsumilli. Taamaattumik soqutiginarpoq paasissallugu suna tamatumunnga pissutaanersoq. Tamatuma saniatigut soqutiginarpoq paasissallugu, nunat allamiut nilammik imermillu tunisassiortartut Kalaallit Nunaanni pilersitsisinnaanermut periarfissat qanoq isumaqarfigineraat.

Tamanna tunngavigalugu qilanaarpunga apeqquutima akineqarnissaannut ullut sulliviit qulit iluanni.